

# BAKAR HAMZAH AKUR DENGAN REALITI POLITIK

**DENGAN** bersenjatakan semangat dan kegigihan seperti ini, Ustaz Abu Bakar akhirnya berjaya menjadi Ahli Parlimen (1964) Setiausaha Agung (1972-1974) dan kemudian Setiausaha Parlimen (1973-1974).

Ustaz Abu Bakar Hamzah melibatkan diri dalam politik tanpa berpasukan. Beliau bersendirian dan, tanpa kuasa dan pengaruh setelah dipecat daripada PAS dalam tahun 1974, beliau sekali lagi, berbekalkan pengalaman tahun 1950an ketika ingin memajukan dirinya dalam pelajaran, mengambil keputusan nekad untuk melanjutkan pelajaran Ijazah M.Phil. di University of Kent, England.

Seperti yang diceritakan oleh Prof. Dato' Muhamad Abu Bakar, Ketua Jabatan Antarabangsa dan Strategik, Universiti Malaya (kini penyandang Kerusi Tun Razak di Ohio) beliau terpaksa menempuh pahit maung dengan menjual kuih dan hampir "give up" untuk mendapat ijazah di Universiti Kent dan sekaligus melangsaikan cita-cita berpuluh-puluh tahun untuk memiliki ijazah tinggi.

Kejayaan seperti ini hanya dilakukan oleh orang-orang yang fokus dalam mencapai matlamatnya. Sebelum itu Ustaz Bakar ditugaskan merangka penyertaan PAS dalam Kerajaan Campuran dalam tahun 1972 sehingga berjaya ditubuhkan pada 1 Januari 1973. Ramai penganalisis berpendapat sekiranya Tun Razak tidak meninggal dunia pada 14 Januari 1976, PAS mungkin masih kekal menjadi anggota Barisan Nasional dalam tahun 1978.

Selain Ustaz Abu Bakar Hamzah dan Dato' Asri sendiri, nampaknya pemimpin-pemimpin PAS yang lain tidak banyak memainkan peranan dalam penubuhan Kerajaan Campuran. Dalam tahun 1978, parti yang

*Era Baru - 20/4/2007*  
diusahakannya untuk menyertai Kerajaan Campuran dan yang membolehkan perpaduan Melayu tercapai, disingkirkan oleh Barisan Nasional.

Setelah dipecat, Ustaz Abu Bakar diterima semula sebagai ahli PAS pada Februari 1983 dan malah menang pada pemilihan Jawatankuasa Agung di Muktamar PAS tahun tersebut tanpa hadir. Malangnya, ketika ini PAS diserapi oleh anasir-anasir radikal ala Iran.

Haji Yusof Rawa menggantikan Dato' Asri sebagai Presiden PAS dalam tahun 1982 dan puak radikal mula menguasai parti dengan imej yang lebih orthodox dan non-kompromi dengan puak konservatif seperti Ustaz Bakar.

Kecewa dengan perkembangan yang berlaku dalam PAS maka Muktamar PAS pada tahun 1985 menyaksikan Ustaz Bakar bertanding menentang Presiden dan Naib Presiden. Kegagalan beliau dalam percubaan ini menghapuskan semua sekali cita-citanya untuk mengubah PAS lebih bertoleransi, liberal dan kompromi, khususnya dalam hubungannya dengan UMNO dan Barisan Nasional.

Dalam tiga buah buku beliau yang diterbitkan yang dikumpul dari pelbagai rencana akhbar yang ditulis dari tahun 1982-1992 seperti Takhta Kekal di Hati Rakyat (1992). Zaman UMNO - PAS Bersatu - Kegemilangan Islam dan Kedaulatan Bangsa (1992) dan Quo Vadis PAS: Politik Spontan Antara Abu Bakar Hamzah dan Ibnu Muslim (1989), Ustaz Bakar cuba menjelaskan peranan dan sikapnya di belakang perancangan untuk menubuhkan Kerajaan Campuran dalam tahun 1973. Dari tulisan dan penjelasannya ini nyata Abu Bakar Hamzah terpaksa menerima realiti politik pada masa itu seperti seekor singa tua yang telah terluka.

**Sejarah  
PAS**

SIRI KE-48



Oleh:  
**Dr ALIAS  
MOHAMED**